

Er estudiant

Premsa entara comunitat educatiua d'Aran



Era sciéncia ei divertida

Ei evident que i a còps qu'es matèries didem-ne de “sciéncias”, mos pòden semblar fòrça pesades. Tot depen de coma vos ac prenetz: coma ua obligacion o coma ua diversion. En açò de diversion, non volem díder prener-se es causes a nivèu pòc seriós e de badinada, mès lèu tot eth contrari. Açò dera sciéncia ei tant important e mos condicione tant era vida

jornalièra, que de tant importanta qu'ei, mos la cau gaudir.

Gaudir d'ua matèria der Institut? Per qué non?.
 Dilhèu quauquarrés pensarà que coma qu'eth o era a escuelhut uns estudis mès de “letres” e com qu'era fisica, era quimica o era matematica non son era sua eleccion, era sciéncia non ei causa sua.

Donques se confon. Pr'amor qu'en tot, absolutaments en tot çò qu'emplegam ena vida jornalièra i a sciéncia e ua des sues aplicacions, qu'ei era tecnologia, e non cau díder que tanben i a sciéncia e tecnologia enes utisi damb qué mos divertim. Dempús de com emmagazinam e reprodusim era musica, enquia es ordenadors, Internet, es mobils, es vidèos, es televisions en tot passar per esquís o bòtes e encludida era ròba, productes que son totauments elaboradi en tèrmes scientifics, entà arténher es melhores prestacions entar usatgèr. Era sciéncia ei mès qu'ua matèria.

Dilhèu i a quauquarrés qu'encara non se n'a encuedat que de contunh mos passam informacion entà crear-mos ua mentalitat damb critèri. Açò non sonque ei ua causa d'estudiants, tanben ei un ahèr d'adults, pr'amor qu'era formacion ei contunha.

Sense ne encuedar-mos auem aprenut concèptes

basics de sciència: coma era organizacion, coma eth cambiament, coma era diuersitat o coma era integritat.

Fixem-mos en concèpte “integritat” e arrebrebem que i a ua etica scientifica. Etica scientifica tant des grani tèmes coma des petiti, e s’a d’acceptar que i pòden auer errors e que se’n pòt apréner d’aguesti errors. Pr’amor que justaments podem hèr descubèrtes importantes en tot corregir es nòsti errors.

Ac podem questionar tot, mès en tot anar tàs coneishences scientificas e en tot redescubrir es “artefactes scientificas e es sues leis” per nosati madeishi. ■

Collectiu Mistral de Vielha